

四庫全書

集部

欽定四庫全書

誠齋集卷一百七

宋 楊萬里 撰

尺牘

答贛州彭郎中

某伏以小至將臨清霜寒霽即日恭惟判府郎中尊契  
大期年報政惠化川流民咏天相台候動止萬福玉婣  
受祉山則某老日益侵病日益加閒冷之蹟姓名不敢

自達于通貴之前四方人事皆已掃影今茲陽復令辰  
君子道長有如台座心所起敬亦不克奏記為踐長之  
賀蓋昇沉異勢其理然也不謂台慈折節岳牧之尊篤  
契韋布之舊遣騎損誨訪問生死鈴齋名酒分餉楚夫  
以暖其長饒斷黃獨之寒以勞其散薪煮白石之苦攝  
衣下拜黍谷春生中心藏之多言何謝一衣帶水無從  
伏謁金玉是身筆橐就列日夜惟此之禱

答廬陵劉縣丞

某伏奉誨帖以小春絕品分侶堊人烹玉塵試春色心  
知韻舌知腴第恐春風不慣腐儒湯餅腸耳一笑占謝  
不既悚仄悚仄

與湖南運使陳郎中

某伏以小春良辰新寒氣肅即日恭惟都運直閣郎中  
玉節倚天忠誠貫日百城蒙惠三神孚體台候動止萬  
福某敬拜手奏記徹姓名于槩人仰惟財幸

某也愚不肖顧獨有落落心事吐之則誰聽不吐則不

釋開卷闔且想千載若相期茲非退之之詩乎士或日  
接膝而相知或異世而相慕茲非退之之語乎某之  
與執事同生于今而謂之異世謂之千載可乎不可也  
繫執事以又玄之學不世之文一戰文闡萬人奪氣有  
司即目收異科策高足偃名藩冠望郎陞延閣持英蕩  
豈弟于州忠慨于朝風采于一路厥今談者言當世之  
名勝必曰陳公焉某老病之身不中世用棄官八年請  
老四祀襁褓乎西疇之烟雨簞筇乎南澗之水月獨不

得與嶽麓之猿鶴橘洲之鷗鷺一望執事之聲光以某  
之想慕知退之之想慕想而不見慕而不釋不于執事  
乎吐之將于何吐之尺一旦下紅藥紫薇貯公之歸自  
此愈遠矣臨風慨然

某惶恐再拜敬問台閤玉媛即日恭惟尊尊幼幼受祉  
山則有廬陵委願奉教條某惶恐白事中男承務郎衡  
州安仁監稅務次公筮仕云初百事牆面孤寒伶俜之  
跡所望于上官收卹其尺寸而脫畧其罪戾昧其始而

全其終百穀之仰膏雨厦屋之幪震風舍執事疇依者

與衡州陸知府

某伏以良月行冬初寒以雨即辰恭惟判府太中填撫  
大維歸若天柱民謳豈弟天迪忠嘉台候動止萬福某  
謹盼飾不腆之書自徹于涓人謁者之伍仰惟財幸

某竊嘗洞視今古大夫之家有能擅勲名之場沂儒學  
之源登文章之錄世濟其美嬋媿相踵有陸氏若者乎  
無也若遜抗在吳若機雲在晉若德明敬輿在唐皆人

中龍也孰謂古有其人而今未有乎執事英妙之年拔  
奇收科玉映潢臺德明之儒學機雲之文章蓋魯國之  
寶玉大弓黃梅之夜半衣鉢皆家傳之自得而不問外  
人者也遜抗敬輿之勲名天下方有望焉衡山之雲綠  
淨之波豈真能苛留者一州之福將均宏之于天下公  
卿闕而選所表寵渥徵黃誕真禁近其不遐矣某也山  
林楚人已抽手板付丞相矣安得一覲當世之勝流以  
一洗其胸中之悃政乎敬賦草蟲之三章以寄此心



某惶恐再拜僭越敬問台閤玉嫵即日恭惟尊尊幼幼  
受祉山則廬陵有可効老聃之役者唯命是聽某惶恐  
白事中男次公筮仕有俶百事牆面今官衡之安仁監  
稅正隸大府之下邑遂得仰事高牙大纛之光塵充太  
史之牛馬走豈無涓埃收之恤之豈無罪戾燾之免之  
不勝舐犢之情不敢自蔽而瀆聞于大君子之聽不勝  
主臣

答權桂陽軍斛通判

某伏以良月行冬初寒帶雨即日恭惟權府府判太中  
設監最課假守兼官二境宜民三神隕祉台候動止萬  
福某敬上記以謝書禮報况一再之辱未見君子願言  
珍重立俟春風玉筍之除

某屬者專走家僮修敬樹門之隸人廼承諸臺遴賢兼  
刺鄰府春仁秋威洽于二邦在彼願其為真在此願其  
終惠疊是最狀于以上聞外陟使華裏翔郎署在此行  
矣其中男次公効官有俶百事牆面適有天幸得我鄉

先生而葆賴焉未趨府庭而薦口已徹于五馬至于假材官而六之使不徒行以抵官下不貲之恩盡室永懷東坡與王定國書云我兒即公兒也敢一請再請不一請而已也惟終惠之

與湖南黃提舉

某伏以維孟之冬亦小之春即日恭惟提舉太中一節星臨百城霜凜民氣嘉樂神天給扶台候動止萬福某敬齋心奏記司鉛槧者仰惟財幸

某恭聞今皇上顧憂元元逖在湖山之外其欲安安如在畿甸之內于是疇咨宰臣涓選膚使如西周皇華之五章如東京臨遣之八人者惟提舉太中以豫章棟幹之材商瑚周璉之器繁星五緯之望百千人中裒然舉首仁風先春義氣後秋霓嫠舞歌姦貪瑟縮何其盛也何其盛也使事有指顧此耿中丞之一職豈鬱鬱久居者雞翹豹尾之間尚多虛位非執事是待而誰待也某棄官八年請老四祀孤雲楚鶴之與儔桃花流水之為

釣仰名流之芳風瞻使星之末光可思而不可忘可望而不可見寸心耿耿安得傾豁抑許穆夫人之詩不云乎百爾所思不如我所之引領南雲悵悵款款

某惶恐再拜敬問台閤玉眷即日恭惟尊尊幼幼受祉無央有廬陵委命戒唯唯某惶恐白事中男承務郎監安仁縣稅務次公筮仕云初百事牆面今以虬蟬蟻子之微而仰事動搖山嶽之威是震是栗敢九頓首以請儻或辱許効其十駕而徧覆之以二天使得竊五斗以

活其孥仁人不報之恩寒士不貲之福繫門下是怙

與湖南陸提刑

某伏以即辰大冬初寒小春猶燠恭惟提刑太中出節  
少府訓夏祥刑百城觀風三神錫羨台候動止萬福某  
竊惟祥刑使者千古未聞蓋肇自章聖皇帝咸平四年  
閏五月始有開封斷獄覆奏之詔七月始有諸路並置  
提點刑獄官之詔于是殿中丞李湘首膺荆湖南路之  
選聖聖繼繼此職增重于部使者之中命曰職司今提

刑太中一代人物之英三朝德業之望偃藩持節聲光  
蔚然斗柄垂天慶雲拂日何以尚之結絲而侍禁廷聽  
履而上星辰人猶遲之而原隰載驅于彼丞相將非今  
聖上欽恤亦如選李湘之意耶使事有指綉衣春當霄  
漢立某方廣少陵此詩以賀班公登仙之行也某老病  
楚人棄官八年請老四載講聞嶽峻川流之盛名而獨  
無路以望見其末光一生遺恨孰弘于此寄聲修好吁  
已後矣仰惟高明洞視心曲云

某惶恐再拜敬問台闕玉婣即日恭惟尊穉蒙福姦兆  
有廬陵之役敬請指縱某惶恐白事中男承務郎監衡  
州安仁稅務次公筮仕云初百事墻面天假之幸迺遇  
今日之陸先生修收孤寒而主後進如退之所作行難  
之篇者寬其鞭箠而宥其簡書使得衍食于是以餉其  
口此非人皆有之天此真我獨有之天也嚮風歸依有  
萬其望

與安仁涂知縣



某伏以即日良月初寒恭惟判縣中大佳政宜民自天  
孚佑台候動止萬福某謹上記下隸伏惟財幸

某幸奉瑤林瓊樹之輝光歲月湍奔至于照人風度可  
思而不可忘者了在目翬翬在心旦晝往來于懷也  
執事之才之邵大其施則宜遵鵷鷺之行小而却亦合  
當麾節之寄顧尚淹卹于鳴琴製錦之地何也然學道  
愛人之聲與湘水俱流下轉上聞自密縣而超拜何知  
非福某中男次公筮仕之始百事牆面廼得事其大夫

之賢者豈非幸歟惟故人高誼必有以訓其所未能而  
葆其所不逮者使得餉于是而璧之或全舍執事何適  
矣

送俞憲羊麪

某伏自道塗相傳玉節光華將照臨先人之敝廬日掃  
花徑以俟東來之紫氣惟是荒村去城差遠山厨土甕  
索然不給于鮮遣人賒市喚婦自饌豈不夙夜然高牙  
虛徐而日昃食乾矣一易再易則亦如之偵伺之久倉

猝之頃不免效荷蓀之殺鷄羅氏之烹鴨溪毛埜救此  
固不足以羞於王公者不腆乘壺羊腔麪碩敢贄諸行  
厨惟洞視其禮不足而敬有餘不穀而揮之有萬其幸

答趙戶彥洪

某伏承遣騎墜教殊慰孤寂四六妙絕切磋彌瑩後又  
過前老夫當避路矣可珍可妬兩絕句次之似非得意  
之作也它日進一步則自知之加餐飯長相思玉帝除  
書定應不遲

答周丞相

某下稷吹燈發函奉告覺銀鈎灼煥天氣盡白驚喜絕  
倒命戒程丈銘詩歡以敬承已留玉當少須矣辱相國  
有盡子詩寫來之教春前偶醉餘嚙語憶秦娥小詞云  
新春早春前十日春歸了春歸了落梅如雪野桃紅小  
老夫不管春催老只圖爛醉花前倒花前倒兒扶歸去  
醒來窓曉仰供仲尼之莞爾不勝主臣

答韓提舉華文賀年

某伏以獻歲有倂好雪知時即日恭惟某官玉節倚天  
霜臺拂日三神盡護台候動止萬福某老病退休木如  
沙眠貧而安病而不疚者部刺史之天我獨有二也茲  
焉恭審六條允察千倉既盈威惠川行鰥寡春熙帝疇  
顯庸恩錫書贊進直舜典濬文之閤式增周諏禮樂之  
華恭惟驩慶自此月昇金掌春度玉墀某也幸拭目以  
觀盛事

答程監簿

某伏以春意澄穆即日恭惟監簿契丈大孝哀疚深切  
天相至性孝履支福某卧疴山野庇焉以免未占良覲  
願言以禮制情趾美續聞恪遵聖人哀毀之戒此朋友  
所望者

某山居苦無端便小疎問訊獨有景行之勤廝來剝啄  
誨帖下逮驚喜不勝命戒先丈閣學銘詩某受知不淺  
其何敢辭自視欲然其如固陋恐菲文不足傳遠耳今  
月十五日夜拜領行狀明日撰成又明日刊落其甚繆

者又明日脫藁又明日送似益公求是正併為求題蓋  
臂痛不能多寫凡四日乃書丹畢不知裏事之日此文  
到否蓋行狀逼期乃至非敢作魯人之緩也如莆田陳  
丞相葉丞相皆前期一年送行狀來庶得小從容文字  
較子細耳仰惟幸察

答醴陵錢知縣

某間者闊焉久不聞問每一動心向風永懷便如對面  
語也遣騎墜言驩喜亡量即長春事過中寒暄之雜恭

惟文季知縣中大契兄學道愛人民咏天堦台候動止  
萬福玉婁均慶寄侶新詩朗咏三反五復發清新于平  
淡之中藏古雅于追琢之外非時世折楊黃華之音也  
第如俗學多翻變晚輩論時學等詩不宜筆之于書何  
苦以毒口牙招齒舌乎每以此戒朱元晦今復奉諭古  
來得道人挂舌屋壁間此真吾師也願言自愛以俟馮招  
賀吉水秦宰交割

某伏自牙檣西上紫氣東來日偵先驅令兒輩駿奔注



迺久之寂然竟辱旆旌屈臨環堵如之何其感又如之  
何其愧也達離屬爾尊仰如新即辰春事過中寒暄相  
半恭惟美錦初製民詠天棐台候動止萬福玉璫均慶  
某恭審涓選今日佩服印章教條一新穉耄呼舞恭惟  
驩慶某屬以老病不克從大夫之後修桑梓之恭專令  
大兒謁賀伏幸台察

答新封州譚知府

某頃辱屈使君之千騎臨玉川之數間呼酒嘯歌秉燭

軟語老病之軀頓有生意別去未幾復增永懷尺書寵  
詒殊慙耿耿即辰暮春積雨恭惟明仲判府太中鄉丈  
為裝入覲神天送喜台候動止萬福恭審日邊除書即  
家而拜下轉中和之政上結聖明之知不出以南坐致  
通顯閱貢禹之同載多甘茂之一官才解二千石之章  
即佩見大人之組恭惟驩慶某伏自壬子棄官丙辰乞  
骸四年三請一奉不允之詔一不報今請乃蒙恩增秩  
一階進職四等非平時揄揚何以拜此方且辭免職名

未敢推謝餘惟珍重即立春風玉笋之班

與朱侍講

某伏以四月維夏南風之薰即日恭惟侍講殿撰尊契  
丈燕處超然天棐履祥台候動止萬福某老病日侵祇  
有不如顧棄官八年乞骸三請待命四載前月四日乃  
始蒙恩放牛桃林俾聽橫笛惟是增秩進職踰分絕等  
方且辭免自非平素借重何以拜此伏自去秋得一書  
于曾無疑許既而遇甘道士往五夫因之修報不作石

頭事否近得城中親舊書云契丈露章告老而適當新  
舊尹去來倥傯之間幕府文書不免魯人之緩遂致相  
誤且無疑來訪具談其詳相與太息天下之事固有蹉  
跌如此者莫之致而至者命也浮雲去來想能安之無  
待于開譬也足疾今年不至良苦否吾曹老矣能復閱  
幾寒暑少年狡獪著書罪過願痛掃除退之云書于吾  
何有此外無可相規者餘惟珍重永綏眉壽

與丞相

某僭陋二詩仰獻一莞不敢奏記懼勤報章而山僮言  
歸銜袖彪列蓋天落雲錦之書華星秋月之字金聲玉  
振之詞也盈尺之紙萬寶是叢肅然盥手而披文頓覺  
沈疴之去體銜戢何謝藏弄為榮仰惟鈞慈下燭惻惻  
有萬其幸

某移病棄官今已八年三章乞骸四載竢命近蒙聖恩  
解縱歸田而增秩一階進職四等控免弗俞黽勉下拜  
重念某孤陋之蹟奮自諸生効官于中外者四十六寒

暑矣乃今得以保全幸無玷缺不辱先人之教茲蓋我  
丞相以天下之大宗師長育吾鄙之小子挈攜造化不  
遺餘力遂濟登茲感恩戴仁無以表見敬哦小啟別紙  
申呈仰惟鈞察

答周丞相

某疇昔之朝方被控免弗俞之命登時下拜賀書際晚  
走兵人奏記并短啟以謝造化之恩當既徹聞矣今日  
下稷上介戾止法書賁之雲箋郁紛玉句鏗戛墨池家

傳之故事援據罔遺黃公酒壚之戲言收拾為雅荷聖  
恩之非淺入鴻筆而彌榮摧謝不莊悚感無斁仰惟鈞  
察

答周提舉

某疇昔之辰方被控免弗俞之命登時下拜即具短啟  
摧謝我乘成老先生蓋引年致為臣之風曠不見聞于  
昭代久矣惟公家伯仲首倡遐舉以媿貪夫如某之淺  
陋豈不懷祿耽寵仰慚二大老之高節故欣慕踊躍以

自附其末光所謂魯無君子者歟而遣騎詒書華以箋  
啟英詞絢練逸韻清錡至于履危機居憂患與夫杜陶  
汲賈韓孔歐蘇等詩某何人乃敢承語此此殆詞人逸  
筆不能自制輒借某以裝鋪席者耶緹衣十襲拂除蛛  
塵永以為寶耳權謝不莊主臣主臣

某伏奉別紙諏及花事老圃舊有蘇花四百株丁巳秋  
曠枯及其半豈敢望萬象臺上春光姦兆之秋毫也耶  
邢尹不可相見必有能辨之者一笑



答聶倅

某伏以高軒偉然一新風月之壯觀蕪詞陋矣不啻巴渝之俚音既澆翠珉之鑿鑄復點華綺之藻藉賜以墨本覽之楨顏摧謝不莊誦言靡已仰惟台察

答張尚書

某伏以即日暑風清微恭惟詳定判部尚書尊契丈八座穹崇名位兩隆天監孤忠台候動止萬福某頃嬰清漳之疾偶拋彭澤之米荆扉深閉今已八年丙辰古稀

之齒上章乞骸前後三奏俟命四載乃今始蒙被聖恩  
放歸田里惟是增秩一階進職四等此禮特異控辭弗  
獲俯俛下拜不勝震懼自非天上知己吹送之力何以  
逮此懷感何數自顧襁褓在躬夫須蓋頭竊自薄陋不  
敢貢尺書以謝齋閣不謂屈尊念舊忽拜天落雲錦之  
書訪問生死侑之以天雄附予北果之珍餉拜嘉驚喜  
亟覩亟拜此事今無古或聞也唐律一首小見謝幅一  
覽亦可知別後筆力之退自此吾弗敬子矣荷荷雲泥

益陽伏謁何階願言珍重即看趾美祖烈邁跡韋平用  
光吾道

答胡季亨

某辭奉談間居諸易逝妙帖下逮長牋偕來明月連城  
驟驚滿把落英墜露頓覺回春某三章乞骸四載俟命  
蒙恩從欲謝事歸田顧摧謝之未能忽慶語之先辱叙  
報不恪伏惟財幸

答臨江王守

某伏以即日維孟之秋殘暑未退恭惟判府太中尊契  
丈惠化告成民歌天棐台候動止萬福玉婁咸慶某老  
病坐踈安訊而金玉之音紹至矣清江使君百餘年間  
豈無一聞人而三孔之文未傳非闕歟今旁搜放失遂  
成一書舉一推萬其政無遺典矣分似名山之副至惠  
至感野人孤陋不足以鈎君子之深者然植之以豈弟  
之根莖而茂之以平理之枝葉則塗之人異輔頰而同  
謳吟也賈子所謂類非俗吏所能為者非歟然某猶竊

有恨安得結輩十數公參錯天下為邦伯使萬物吐氣  
吾與少陵蓋異世而同恨也相去尺有咫無從參拜北  
眸惘然願言貴珍即膺公卿表選之制大兒昧學仰辱  
異知盡室榮之又恐立霄漢之日貴人多忘耳荷荷

答市舶葉提舉

某伏以維孟之秋殘暑未退即日恭惟景伯提舉太中  
僚契丈使事整暇有相自天台動止萬福某老病日  
侵自丙辰以後三章乞骸四年俟命邇者方蒙被聖恩

察其懇切放歸田野而增秩進職異數優隆控辭弗獲  
詎勉倖受震懼靡寧未皇推謝先枉慶緘契丈把麾持  
節已徧外庸盍歸春風玉笋之班以宏其施垂天之翼  
尚小留滯周南何也先丞相銘詩屬之益國真今之無  
價手也甚善甚賀雅意或欲持江介之節此老夫之福  
也里諺云老人如小兒得人矜憐而溫存之乃其願欲  
者荷荷願言珍重以膺新渥

某再拜僭問契家台媿即日恭惟尊尊幼幼受祉山則

令似長育計今應就傳從學久矣想一日千里也遠餉  
通應異味絕交經歲矣鯁尤耐久山村客至便可供一  
杯也珍感珍感有委不外

答趙運使

某伏以時雨滌暑老火作仇即日恭惟都運敷文年丈  
宮使奉瑄祝釐天廸燕喜台候動止萬福某入秋感暍  
遂作瘡疾平生故人黃昏為期彊半舍去獨此謝謝水  
魂與僕作緣雙日暫別隻日必至殊不棄約今日當見

臨危冠焚香方徙倚以俟之而年丈語離之書如天落  
雲錦泚手披讀此疾忽脫然去體古人草檄可愈頭風  
僕始不信乃今知之甚榮甚惠凡今之交其合若萍其  
散若烟有如吾年丈之有情若斯者乎無也偉材達學  
何必減不土之里無言之詩著侍臣冠而立玉階方寸  
地自是國之光輝外庸已枉其人矣而又遽聽其去可  
為時歎不為年丈惜也寓直寶儲上意可占又有大者  
乎願毋疾其驅以俟詔追



答傅尚書

某伏以時雨致爽秋陽作彊恭惟判府華學尚書尊契  
丈岳牧詞人民之父母三神隕祉台候動止萬福某伏  
自壬子之秋移病免歸山林野人姓名不入修門書問  
不至朝貴至于平生知己如台座者亦復作疎非意也  
勢也微高朗洞視其何實非罪丙辰以還三章乞骸四  
載俟命邇者始蒙聖恩察其惓惓放歸田里而增秩進  
職異數優隆控免弗俞倖受震輓揆厥所元嗟枯所逮

道遠莫謝而一介行李剥啄荆扉把一封書天落雲錦  
慶語玉潔故情春熙脫畧雲泥相望之懸彌堅金石素  
交之誼今人有無此事固不論也求之古人有是否乎  
未可知也其榮其荷宜如何也台座人望在今所謂水  
之江漢星之斗者廟堂虛位上宜置諸左右下猶舉疑丞  
而宅之武夷山川似不得苛留此一朶垂天之雲也願  
言貴珍以須書贊之汗渙

某再拜僭問契家台媿恭惟尊尊幼幼受祉山則大兒

荷不鄙下問何榮如焉敬拜謝意未敢奏記不專故也  
遠餉新茶所謂元豐至今人未識者老夫是已敢不重  
拜當自攜大瓢走汲溪泉來澗底之散薪燃折脚之石  
鼎烹玉塵啜雲乳以享天上故人之意媿無胸中之書  
傳但一味攪破菜園耳荷荷

答戴左伯知縣

某伏以秋雨進涼即日恭惟知縣朝議僚友學道愛人  
奉法循理民謳天集台候動止萬福某敬修辭以謝光

辱伏惟財幸某沉痾自屏親者掉臂而過疎者白眼以  
覲惟吾故人金石不移松栢後凋年歲錄續遣騎詒書  
訪其生死于黃犢之草中白鷗之沙上彌久而益堅不  
懈而愈劬一何與人異嗜好之酸鹹如此哉某自壬子  
棄官丙辰請老連牘三請俟命四年近蒙聖恩放歸田  
里惟茲異數優隆力控弗俞僂受震輶皆故人平素吹  
送之助也佳政宜民下轉上聞借令未至如卓令之入  
宅公府小却猶應察廉烏臺含香粉署所謂家貧望鄰

富也荷荷

某再拜上問契家台姪伏惟尊穉咸慶賀箋妙絕久不聞韶感喜無斁小啟稱謝却成以瓜報瓊也寄似紫花朮石乳香拜受寶之珍之此正扶老所須者故人之意厚矣感感

答余丞相

某伏以即辰風生桂枝露下金莖恭惟觀使大觀文左丞相珍臺舉伊平地松喬訓畝愛君江梅存闕三神顯

相隲祉發祥鈞候動止萬福恩闕相嫜尊尊幼幼純嘏  
山則東閣郎君伯仲直閣叔季出處皆足慰意其餘生  
奄奄本之以支離疏之形骸申之以遺積瘕之沈痼歲  
在丙辰幸及未先犬馬填溝壑之須臾自列上聞旬歸  
田里一奉不可之詔一蒙諸公間寢其事答以官簿之  
年未至三表乃荷聖恩放牛聽笛縱鶴出籠此已徼福  
不貲矣而又增秩一階進職四等以榮其歸而華其老  
以鏡湖老監而初豈夢到甘泉法從之綴乎深惟我聖

主所以幸老臣者而誰實白發其端乎揆厥所元不在門下而奚在遠未克謝而濟翁弟子七月二十三日轉致荅教乃四月某日筆也披讀有衛武公鄭子真之褒有乘安車策鳩杖之賀某何人敢竊仲尼一字之褒乎感恩在心言之淺也竊審秦階之光尚寓躔次于贊公之房人以為陋我以為華所謂無地起樓臺相公者何處覓庾冰庾冰正在此一笑親戚吳權璪遂蒙若肯少徯敢不他時備數之諾某敬代吳下拜以謝恩言矣來

年既盡則辛酉上半年文字正渠書考第三之日何晚  
之有小兒幼輿入京換授此又我公之恩也令詣翹材  
以謝焉此外不勝大願愛金玉之身即著袞繡之歸濟  
翁掌故舉族洋溢乎恩波中矣

答林提點

某伏以顯氣過中龐涼彌厲即辰恭惟都大提點寺丞  
玉節行部使星還次高厚孚休台候動止萬福某老病  
餘生懸車曲肱兩耳掩豆乃不聞知拂天之旆照臨鄉



邦曾不得隨父老扶杖縣令負弩之後以遮見右轅之  
清塵不敏之辜雅宜笞罵而一介行李盈尺錦書惠然  
飛墮野廬之荆扉慙慙暄涼訪問生死黃冠草履之人  
何以辱此于部使者攝衣端拜盥手朗誦如獲寶玉大  
弓舒鼎昭兆不翅也非有胷無心疇不懷者占詞摧謝  
萬此寧足願言愛金玉之身竚筆橐之拜心禱髦髦

與張寺丞

某伏以即日千崖秋高恭惟功父寺丞詩兄大隱隱朝

自天墮社台候動止萬福某老病餘生人事盡廢書問  
不入帝城平生故人有厚于吾功父者乎無也亦復作  
踈可不可也寸心孤往惟夜夢多見之耳吾曹抽手板  
付丞相良一細事某乃四年三請而後得之士大夫以  
躋攀分寸而上為難不知乞身謝事其戛戛乃爾功父  
所挾者古而所售者今所賞者稀而所餽者衆十里九  
山一武再止想前知其然而怡然不怪也觴豆湖山簫  
勺風月優哉游哉聊以卒歲肯遽以此而易彼乎小兒

幼輿入京換授敬令一見東坡與王定國書云我兒即公兒也惟面命而耳提是所望者願言珍重當有夜誦子虛者

答徽州任知府

某伏以即辰秋光晚晚顥氣高潔恭惟判府寺丞契丈露冕惟新建牙伊煥老倪呼舞神天成釐台候動止萬福契家玉婍受祉山則某老病餘生伏自壬子棄官丙辰乞骸今春乃得卷懷衣冠雜襲麋鹿惟茲影響昧昧

自頃一別每于山間仰故人于雲漢之表揭日之名曰  
起排霄之步日遐未嘗不為之喜而不寐也茲審蹔違  
鵷鷺之行自詭股肱之郡一麾出守千騎東來恭惟慶  
愜某不量野人之疎賤妄有白事同郡名士糾曹戴從  
政重熙妙齡收科一再試吏其文詞清駛奔逸源流出  
于東坡而得其髓長書大篇百千言益出而益無窮愈  
讀而愈有味今親逢岷江之文伯而為之東道主故應  
坐上一見而察其小異不待外人拈出而後知其為道

側之遺寶也敢望未及下車而即取一人焉拔其尤特  
刻一上半年京秩之章以列于公車則黃金之臺隗始  
之舉古人復生何以代此且薦士本意古者惟其賢而  
已今則不然不惟其賢而惟其勢一洗今之俗而返之  
古不在吾契丈而誰在也進越之辜不敢自省敢自歸  
于司敗也黥歛山水之邦異時名公作牧者累累焉某  
在江東日嘗一過之以使事有指不敢入郭至今遺恨  
紫陽諸峯皆與知之今以告訴于使君之天其肯與我

酌尊中之醪問諸峯之神而一笑乎久不揮塵從談下  
筆云云如旋盤之落屑不自覺其煩且瀆也雲泥相懸  
渺然無合并之期不勝大願願言迺玉是身以柱吾國  
家即還從上雍

與韓運使

某惶恐死罪僭有白事頃者一介行李五朶祥雲照臨  
之日比其返也因之奏記蓋嘗進越以徽州錄參戴從  
事重熙為不滿篋櫝之薦貴人多忘野人冷書不蒙抵

擲與否敢再以請今歲下半年金臺京秩之章可得而  
下拜否竊知高風卓絕不揺于熱書而每喜于冷書是  
以恃此而無恐不然何罪之敢追



誠齋集卷一百七

# 欽定四庫全書

集部

誠齋集卷一百八

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官中書臣宋枋遠

謄錄監生臣張泰



欽定四庫全書

誠齋集卷一百八

宋 楊萬里 撰

尺牘

答王樞使

某伏自春時張糾之官因之奏記今月十一日臨江材  
官持報教以來天落雲錦以驚以喜端冕廟堂之容坐鎮  
雅俗之節凜然在人目中也即辰黃花節過風露清峻

恭惟觀使觀文樞使相公明晦忠君江湖存闕自天墮  
祉鈞候動止萬福某老病餘生待盡環堵自丙辰乞骸  
露章三請竢命四年逮今歲春夏之交始蒙被聖恩察  
其非矯偽者放牛縱鶴以遂物性惟是異數過優增秩  
一階進職四等控免弗殺僂受震甌揆厥所元微我天  
上知己挈攜振德不遺餘力曷濟登茲千江隔而萬山  
阻未克抒謝先辱慶語仲尼一字之袞劉公十部之賢  
野人拜此榮光赫然下燭節屋上衝斗牛矣未占避席

之侍願言愛重即還虛左之位式是萬邦

答朱侍講

某九月十月之交于甘道士曾無疑許連得報教二書  
幽憂滿懷風濯雪釋即辰首冬殊溫恭惟致政侍講殿  
撰尊契丈懸車里門天相台候動止萬福玉嫵尊穉均  
慶某老身幸安穩黃能臺駘輩察其納祿不官驚股無  
可割者不蒙見崇而今歲秋熟不照年例特地助祝融  
為虐坐甑蒸灼怏怏無奈先之以牋申之以河魚蓋兩

月而後已得書云股肱之疾移及腹心且艱于憑烏皮  
呻青竹是在醫法顧不察耳藏神不曰孰使我飢渴之  
不恤者非書乎孰使我劇目鉢心掐擢胃腎者非書耶  
某屢陳囊研櫝筆之方而以水投石諗以酷嗜在此第  
恨病而力不足耳政使和緩復生能浼此學古之胸而  
砭此土炭之嗜耶諏及啟棘賓商之義即問于益公益  
公報以二說今錄在別紙以聞所著楚辭解甚奇可得  
而窺見否獻方之未既而又縱史之又似李公擇戒東

坡勿作詩而反送墨也一笑願言珍重用永麋壽

與湖南安撫趙郎中

某伏以元緯和平執權司冬即辰恭惟判府安撫華文  
郎中制閫雄深連帥崇崛一面攸寄三神所禧台候動  
止萬福某敬拜手奏記潭府之中涓仰惟財幸某竊惟  
近時岳牧之繁雄如金陵六朝之故國長沙定王之古  
城居上流控形勝其責任均也二邦大帥異時一人大  
丞相之閔勞鼎鉉息肩戟纛者于是乎居焉其不輕而

重明也華文郎中以兩京政駿之儒先間平之德望為  
皇朝不土無言之賢且文實繼一二鉅公之殊轍令修  
于庭戶之間而人自得于湖山之外作一長城當十萬  
兵一何遑哉至于賦詩以叱開衡山之雲命騷以彈壓  
洞庭之波此又其陶鑄之土直云耳紅塵一騎紫橐兩  
禁日斯邁月斯征某也尚竊遲之退惟老病之身已垂  
車以示子孫矣天不作緣有如執事一世之名勝如朝  
陽之光在物久矣而某居覆盆之下乃不得快睹青天

白日之清明茲非命也夫然乘化歸盡偶未先朝露之  
間猶得九頓首徹姓名寫慕用以聞焉抑持以自賀云  
某惶恐再拜敬問台闕玉婣恭惟即日冬寒尊穉介福  
川增山委有廬陵之役承命是荷某惶恐白事中男承  
務郎監衡州安仁縣稅務次公筮仕云初百事牆面天  
假之福得仰事禮樂詩書之元帥慶雲之惠不別荆棘  
厦屋之燾必免震凌仲尼不云乎吾舍魯何適矣惟仁  
人照臨之

與周丞相賀冬

某惶恐今茲歲在鶉火之律月旅黃鍾日臨長至惟皇  
上帝萌陽氣長君子是用錫純嘏介眉壽于我丞相于  
時賀賓載集壽筭斯舉而下客某也為賈獨後譚子不  
至非罪歟不腆春酒有十其壘敢效野人芹子之誠奉  
上一觴千歲之壽仰惟鈞慈不賜麾去有萬其幸屬者  
次公辭行之官仰蒙一再宴集父子迭主致曲示恩又  
賜之以帥漕薦禰之書至矣盡矣盡室銜戢抑又聞新



作樓觀排霄拂日如元龍之百尺東坡之十丈皆奄有  
之一何壯也幼輿次公之歸皆能言釣誨云將與某落  
之宿昔傳聞豈若身見之為榮也亦既沐浴戒行李以  
須皮冠之說迺前月二十有六日疇昔歸塗之疾驟作  
委頓僵卧日惟恃粥如麴生卧沙薄持牢九之輩皆絕  
交矣寸步非杖不履陳三詩云人言寒士莫作事鬼奪  
客偷天破碎茲游不遂茲命也耶呻吟成聲因得唐律  
三章敬以獻焉以佐工師繞梁之驪以代燕雀臆對之

賀以贖病夫衡命之誓併以聞焉仰惟財幸

答周監丞

某伏以一雪應期三時有望即辰恭惟致政提舉監丞  
鄉丈獨立萬象之表高並兩原之峯春祺鼎來眉壽川  
至台候動止萬福某已修獻歲之慶茲辱行李之臨親  
染銀鈎鐵畫之法書朗誦玉佩瓊琚之雋語足華其老  
亦孔之榮至于餽節之慇懃粲然為儀之溫厚紋魚異  
品而雙止良醞盈尊而四之右彭蠡而左洞庭忽登瑯

俎滴真珠而濃琥珀快吸山杯拜嘉載欣摧謝無數仰  
惟台察

與江東韓運使

某幽屏山間與縉紳東西行者畧不相遭仰止繁星之  
芒寒寸心深切欲寄雙魚之白錦其道亡繇凝神載馳  
與江水日夜而東下也即辰一雪知時歲律適止恭惟  
都運華文丈玉節山立霜威風生天人具依台候動止  
萬福某老病日侵桂冠得請上恩優異孤迹歸全微台

座及晉之波曷濟登茲感極幸極繡衣持斧觀省民風  
聖主仁厚之澤沛然覃于畊桑壠畝之上災獨幽枉之  
情滃然徹于黠曠玉藻之下使事有指盍歸春風玉笋  
之班用宏厥施山林野人蓋日望之某惶恐白事項因  
便風嘗進越以徽州錄叅戴從政重熙為篋櫝不滿之  
薦恭承台翰報之以今歲下半年與來歲上半年京削  
皆有前議矣仰測台意蓋已心許而化筆未及也寒士  
得此何福如焉乃知貴人多忘閒人言輕之說未易可

以測滄溟之斗升度嵩高之尋丈也敢復僭懇欲乞台  
慈特輟來歲下半年一京削以收錄之不勝大願某亦  
嘗薦之于徽守任丈任丈已發來年上半年破白之章  
矣併祈台察再三之瀆無所逃刑仰惟矜恕未參拜問  
願言珍重即膺賜環之寵

答徐參議

某伏以即辰景迫週年天欲再雪恭惟致政參議直閣  
年丈高蹈物表獨樂事外天槩名勝台候動止萬福某

老病日侵摧墮已甚所謂祇見有不如不見有所超者  
退之此詩似端為儂發也年丈官簿年齡尚能記憶當  
未及古稀之數恭聞挂冠神虎懸車里門無乃太早儒  
榮之堂干青霄而直上絲綸之誥揭雲漢而下飾斐然  
之詩何異蟋蟀之鳴蟲飛之聲授簡所臨不容九頓首  
而辭避已犯不韙茲蒙伐石深刻架軸裝潢不曰以玉  
櫝而哀燕石以繡段而藉魚目乎寄似碑本榮不蓋媿  
也未占侍見願言珍重以須如壁裏輪之徵

答胡上舍

某久別得誨帖恍若覩玉樹風前之標何如其喜也示  
教程試草卷疾展快覲轉圜石于千仞之溪不足為其  
清駛也敬留錄本以矜式兒輩而歸草卷切幸收至願  
更懋其耘以斂其豐即看冠冕多士之捷親鄙與有榮  
云

答周丞相

某伏以即辰雪後方寒恭惟致政少傅大觀文左丞相

國公潭居府中釣轉天上春回維斗星見老人釣候動  
止萬福某漁釣棄物不自意得幸于今日之公旦灑玉  
字墜琚詞餽節物講歲禮有若均網馮之為者整黃冠  
野服手三盥首九頓而後降拜敬受焉別占蕪語以謝  
嘉惠茲復重啟

答斛通判

某屬者兒輩之官因之奏記材官戾止墮以錦書如渴  
得泉喜可知也即辰欲雪不雪入春未春恭惟府判太



中鄉丈釋彼喧煩歸我風月旌旄尚濕山嶽用光天相  
台候動止萬福玉嫵咸慶某老矣何思何慮獨念兒輩  
未免隨牒餬口四方而次公愚騷未更事懼抵官刑為  
老朽羞微我鄉友知己深厚託契惻欵憐之以慶雲之  
蔭難乎免矣安得廣廈千萬間少陵是也眼前突兀見  
此屋次公以之示及陸丈使君書信已敬受亦復作一  
書謝之望願指材官為投達至幸

答賴守張舍人

某伏以歲事履端春寒方峭卽辰恭惟判府右史舍人  
尊契文閭制繁雄威惠洽暢賢忠昭格后帝孚休台候  
動止萬福某嵒巖野夫無適俗韻晚綴干官雲片之末  
行獨得徧交海內之名勝時則有若舍人文英峙超詣  
欲論卓詭瓌詞清鏘見之使人自失聽之使人忘罷誦  
之使人驚悸古作之絕唱退之所謂惟吾崔君一人者  
非某心服此言奚為至于前哉一別十五年高山仰止  
之詩夢亦不忘也某自壬子之秋棄官還山丙辰之夏

上章乞骸四年三請去夏始蒙上恩聽請放鶴出籠縱  
魚入海方覺吾身之屬我也契丈赴鎮剩欲候紫氣之  
東來遮朱幡而一見既而聞之已望行塵而不及矣蓋  
邨居阻深去城逾遠故也不謂燒襖未暖綈袍益篤裂  
下一封之雲錦倒頃十斛之領珠快閣新篇把玩初驚  
而兵厨名酒未斟先醉不覺頭白眼暗之再明寒窓凍  
壁之春溫也側聆輿人之誦露冕曾未期月而仁行如  
春威行如秋寓精敏于裕和而振寬平於峻整儒者之

政故應有此類非俗吏所能為者不在此其將焉在其  
盛甚賀某解褐初學作吏之日嘗充員是邦之民掾崆  
峒之曉日貢水之秋風今故無恙乎今得一代之勝流  
以為東道主寵光江山湔拂泉石真不孤矣天意欲雪  
清旭寒甚炙硯呵手作故人書其始戛戛忽焉混混也  
安得再見縱談忘塵尾之落飯送飛鴻而揮絃以續疇  
昔之樂耶願言迺玉不貲之身式柱斯文之任即還兩  
地以均宏施

答周丞相

某下稷恭承訓告降拜披讀驚喜不勝野渡斷橋非寇  
平叔訪魏野之便中路破店亦非宰周公會許男之所  
蓋嘗以聞矣而未蒙領之今得銀鉤而後操心不危慰  
甚幸甚為藥枯且盡矣且屬有叔母之戚亦不敢銜花  
以獻也新將戾止即圖一小出巖石之瞻伊邇預以躍  
如

答徽州知府任寺丞

某伏以卽辰春服既成既暄既穆恭惟判府寺丞尊契  
丈惠化允洽民咏其仁天棐其忠台候動止萬福某老  
病侵加乘化歸盡無秋毫可對天上故人談者侍側渺  
無前期不勝大願願言迺玉是身式柱斯文延竚旦旦  
上雍之從某伏自頃來千騎居頭之初寄牋南風以寫  
鬱陶之思以慶人生之貴辱報之之寵問之之多上談  
宿昔論詩之驩下及生死一訪之盟何如其懌又何如  
其感也樂職宣布亦既許日撫字勞心平易近民類非

俗吏所能為者下轉上聞故當不少矣表選之好音應有隕自天矣野人聞之獨後何也戒命先正文集序引命代丈將要必得無價手如夢得乃可序柳文如東坡乃可序歐集不應下屬之某也抑嘗謂代匱漿飲承乏乎欲承命授簡則不揜覲面欲再拜避席則有負交情牽率下筆以塞下教之辱別紙呈似

某惶恐晉越再拜敬問契家台媿即日春熙恭惟尊尊幼幼受祉山則頌貺蠲紙筆墨皆書圉絕品而下拜敬

賦山谷去騷畫虎之篇以謝嘉惠云某頃者偕以鄉友  
戴糾重熙薦諸篋櫝不滿之處仰辱丈人不以為疑未  
及下車而論薦之以京秩奏豈戴君受此恩實某受此  
恩不翅也

答棗陽虞軍使

某老病僵卧瓜牛廬中滯瀕之波久矣沈鱗雪山之風  
亦不到面懷我故人于千遮萬隔之外豈不欲寄一字  
寫九回厥路何由子淵之便了朝來剥啄荆扉踏破苔



徑三書朋至七字偕來披讀醒心清骨奚翅痊頭風也  
即辰暮春暄淑恭惟知能軍使提宮直閣恩契丈金湯  
一障華夷救寧民詠天迪台候動止萬福命戒益公書  
專僕登時馳達令待報也李江州無半面已轉干俞漕  
一書或檄亦以書繳來教及事目付便介持往漕司投  
之又未知俞丈肯從欲否便介必能言其詳也先雍國  
先生銘詩祇俟行狀至即為落筆未見願言珍重即協  
必復其始之祥

答韓運使

某伏以即日四月維夏氣猶清和恭惟都運徽猷文流  
馬勲崇擊隼威肅民二其天神百其相台候動止萬福  
某黃帽青鞋乘化歸盡瑶林瓊樹清蔭焉依空有隔千  
里共明月之寄懷豈若開青雲睹白日之為快上言加  
餐飯下言長相思使事有指遂歸帝所以從上雍惟日  
望之

某疇昔之夜青燈作花破窓既晨乾鵲饒舌私自驚怪

一寒如此槁木冷灰誰復以春風淑之以東緼煖之者  
竊笑未既而江東之雲墮我林磴秦淮之月入我懷袖  
矣字字烟霏而霧結語語金春而玉應此其為賜固已  
百結綠而千懸黎矣而況蚨蜢之羅水紋之縠雲機之  
紗以換其獨速之短蓑五臺之花魚麗之鯊東海之碧  
鱗以洗其藜藿之枯腸乎九頓首以謝嘉惠猿鶴亦為  
之呼舞泉石亦為之焜耀也錢行之章蕪拙可供一莞  
乃蒙蒼石深刻濃墨塗澤花綺緣飾覽之駭歎悚懼媿

汗永詒作者之嗤點耳

某芻蕘之謝謹列他槩茲不累繭恭審都運徽猷策冰  
解漕下之勲膺日邊除書之寵裕陵聖作星翻漢回徽閣  
華棖雲興霞蔚自非名勝莫寓直廬綬紫魚金蕃賜亟  
拜恭惟慶慙某聞之也後賀已云遲惟茲孤懷戴欣靡  
已戴糾書兩辱賜報殊為執事之勤薦紙有限求者何  
窮亦安能周及也戴君荷稱獎感已不淺矣

答建昌陳知府

某伏以即辰玄扈有鳴赤煒于赫恭惟判府大中外庸  
告成為裝入覲天人送喜台候動止萬福某老身幽屏  
何從得一望見玉山璫樹之餘映願省厥網馮對越旒  
宸敬賦卿月昇金掌之詩以竢履成之賀

某洊辱遣騎墜賜誨函折屐走趨盥手披讀情誼獨至  
感喜不勝惟茲良牧刻印昭代大樂之書發金匱石室  
之秘以備陳農之旁搜而答賓牟之大問顧下取于哇  
俚之蕪詞以逋諸篇末不曰以裝薦錦以韋先璧乎頌

以墨本不覺汗浹背也摧謝不莊仰惟財幸

答贛州張舍人

某伏以即辰南風之薰時雨既降恭惟判府右史舍人  
尊契丈五月報政千里生春風謠式和幃載咸若台候  
動止萬福某老病餘生自放于山顛水涯之外麋鹿之  
與處鷗鷺之與渚逢者不識過者不問而我天上故人  
獨回朝陽之暉揭五緯之芒每委照衰朽于覆盆蔀屋  
之下親戚李簿之歸道暄涼問無恙外手把一封書如

天落雲錦也正冠九頓首盥手三復正退之所謂麗日  
寒光之映骨子厚所謂垂露清風之入懷一日而兩得  
之其榮且感宜如何也諷及易書此意尤厚盖老者無  
營瘡者無俚則聊復呻稿簡繙蠹篋且以永日且以遣  
心而已尚不足為京房焦贛之奴婢而況王輔嗣之精  
微程伊川之至到亦何能窺其藩而闢其戶哉八八之  
卦亦未終編未經竄定何急于出而徼于傳也太史公  
曰死之日是非乃定伊川先生易傳已成而身前尚未

出也而況于某乎晦菴先生亦嘗問及嘗以家人一卦  
呈之今亦呈似一本也苦李何必多啖啖其一恐咀之  
未竟而擲棄道旁矣李簿云張先生詩傳已脫葉成書  
矣龜鼎之側儻可染子公之指乎某惶恐僭稟陳幹章  
絕識偉器文學卓越未冠擢第藉甚厥聲數年前為尉  
安福貧到骨而益廉去已久而見思然孤寒無媒蹉跎  
二十年矣今幸遭一代之正人莊士儒宗文師一顧賞  
音便價十倍敢以薦諸篋櫝未滿之處望特輟今歲上



半年一京削以為之破白先生一唱羣賢畢和矣知眷  
是恃故敢于言獨冷無挾故可以言仰惟財幸李簿荷  
國士之遇非但廣廈之庇而已一衣帶水未有望見玉  
山瓊樹之期願言省厥網馮式如金玉即還上雍之從  
以主吾道之夏盟

與隆興府張尚書

某伏以即辰仲夏之月南風之薰恭惟判府安撫華學  
尚書帥閭繁雄德威洽暢芒寒翼軫氣淑湖山三神致

祥台候動止萬福某漁釣一壑麋鹿同羣何幸蒙庥于  
仲尼覆燾之天獨恨未拜于韋伯星辰之履不勝大願  
願言式玉啟處加愛若護即宅釣樞用宏其施

某深惟大江以南督府犬牙而洪都雄峙不作第二唐  
屬之帝子而中興之初屬之大丞相李公不以其上流  
一都會故耶時則有若華學尚書厥今高文絕學之英  
本朝鉅人長德之首瑞一世而福天下粹乎如不驚之  
鳳不觸之麋未嘗朋一善人而善人怙焉未嘗仇一匪

人而匪人懼焉是非有不私之仁不粟之嚴裏充而表  
自孚心化而目不運如古之所謂德人者曷濟登茲耶  
皇上因其勇退之不可留而屬之以上流其不輕而重  
也昭昭矣而某也不意老退之身乃得受一廛為氓何  
如其喜也然父老扶杖而往觀兒童騎竹而驩迎某獨  
不得從其後又何如其恨也泚筆奏記蓋前以為一路  
賀而後以致一已之私云仰惟財幸

某惶恐頓首再拜僭問容駟之門潭居之府德星之聚

蘭王之姥尊尊幼幼即日清暑恭惟善祥叢委山則川  
增某惶恐輒及其私大兒長孺愚駭無佞微邑南昌適  
有天幸遭戰轟肇建之日首得拄笏拜庭以趨走仰事  
五雲三台之末光敢乞廣廈千萬間之火庇不勝懇切  
之至某塵忝正出令兄安國舍人榜末亦嘗屢參拜蒙  
顧盼則此兒亦或者猶在門闌子姪之後塵乎及此則  
僭矣惟夫子忠恕焉

與隆興府趙參議

某伏以即辰昌歆踰節安榴薦芳恭惟參議提刑少監  
先生高議帥聞嘉謀師律后釋憂顧天棐忠賢台候動  
止萬福某老病餘生乘化歸盡慶雲在上覆露焉依侍  
側云渝嚮風孤往願言綏厥泰字式如玉金即隨鋒車  
遂踐台斗某伏自發軔江介歲在六身嘗走兵人奏記  
起敬來年去秋移病上印自此棄官九載請老三章不  
惟衣冠束之高閣而已櫝研囊筆不記吾誰姓名羞達  
于部家書問諱浼于親舊藉第令不自羞諱彼獨不汝

羞汝諱乎乃至于一字亦踈于先生知己至深至厚者之門此故之以柳子所謂非意也勢也繫我先生妙于詩文何必減于介軒峻于德望何必減于大資裕于才識何必減于起部然芒寒色正實大聲闐磊磊在宇宙間者五六十餘年顧乃與其一同其蹇而不與其兩同其亨信矣吾道之艱于逢而善類之永于喟也自令子戶掾之來每見必得聞靜作暄涼之詳先是羞諱之戒可以破矣又作遷延之役老病故也令子下筆其布陣甚

似項羽吏道殊精敏而潔已直道玉立竹裂所謂生子  
當如仲謀者歟敢以為老先生賀

某惶恐再拜敬問師門台嫗恭惟即日清暑尊穉咸慶  
有里中委纖悉唯命某惶恐賤懇大兒長孺受知不淺  
今學為邑于南昌正依仲尼無不覆幬之天百爾誨之  
庇之所謂我兒即公兒也故知不謂而獲然申申而謁  
焉仰惟財幸

與運使俞大卿

某伏以卽辰玄扈載鳴赤煒有赫恭惟交代都運華文  
大卿尊契丈錫節光華冰漕肅給百吏霜凜萬家春生  
三神備釐台候動止萬福契門蘭玉之嫵尊尊幼幼受  
祉山則某伏自春半衝雨江干遮見錦纜牙樯之下風  
得一瞻青天白日之清明滿聽登峯造極之談咏盈襟  
埃垢泠然一空所謂江漢以濯之秋陽以暴之者歟既  
而又蒙書禮舉公讌之盛儀委折俎之腆賜魯之百牢  
鄭之九獻何以尚此野人降拜何如其榮又何如其感



也某抑嘗進越以吉學金廣文薦進于門下不崇朝而  
提舉之京削如從天落有請必從有謁必獲何如其感  
又何如其媿也聞契丈數月之間榮兼三組任不重而  
事不亦叢乎而若漕若帥若憲之政挈領而裘順舉一  
而萬從微開物成務之鉅材聽遠燭幽之絕識泛應曲  
當之敏手昌濟登茲甚盛甚服然再離駕行將十霜矣  
把江海之一麾駕原隰之四牡外庸有續使事有指動  
亦頻矣歲亦淹矣細書夜下甘泉朝陟私尚竊遲之也

新帥既至文書少省而祥刑尚虛位未能不小勞苦某  
惶恐小稟大兒長孺無能不才輒學為邑不寧唯犯五  
不韙而已今茲之官如天之福乃得充下走而執鞭為  
先驅而負弩仰戴于仲尼履幘之天密溉于叔度澄清  
之陂東坡云我兒即公兒也敢以託翁歸之無私可也  
教之誨之俾知為政之方填之撫之俾免淩雨之虞吾  
舍魯何適矣言之煩瀆而不自知也惶恐惶恐未占侍  
側願言省厥網馮式如金玉即從上雍用光吾儒

答太常虞少卿

某伏以即辰仲夏之月南風之薰恭惟判府奉常少卿  
尊契文王立頌臺刺經作制聞樂知德天棐忠賢台候  
動止萬福某老病餘生乘化歸盡仰天上故人于非烟  
倒景之表自是蚊雷隱汙渠醯雞處甕天何敢望分天  
章而織雲錦者小兒來歸袖出華星秋月之書玉聯金  
句之軸藥物楮穎之贈若將卹睦婣而禮高年之為者  
愆邁之人何以得此于夫子通貴之門也九頓首而三

歸依其何感如之東坡云君如大江日千里我如此水  
千山底邈無瞻高明聽清越之期願省厥網馮式如金  
玉用對于掌制進讀之拜

某頃寄奉懷之唐律情之所至而形為聲畫者正如菟  
柳嚙嚙之蜩草根嚙嚙之蟲耳若繩之以敲金擊石雲  
和孤竹之大音則陋且麼矣賡句下逮所謂突過黃初  
壓倒元白不啻也回視倡者徒有或百步而後止耳至  
于近作一軸如槿花朝暮相催君莫問一邊零落一邊

開如乍開乍闔月穿雲如猶有舊時雙照淚而今不忍  
十分圓如木犀天上移來和月種如年來只有賀人書  
如問大鈞縱然不得文章力也向連山去作州如夜永  
只憐燈是伴秋涼最許簾先知數盡更籌窓送曙起來  
贏得髻成絲如九日年來只有身窮健莫把茱萸浪自  
愁如蓬底吟哦詩有味胸中磊塊酒無驩故人莫枉綈  
袍意范叔猶能忍一寒如燭短怕更長如燕使方將接  
踵至淮民未有息肩期如虎皮皮在有餘威如滿懷冰

雪中秋月過眼鶯花上苑春如一別十年難再逢至莫  
為元規扇障風此又珠中之徑寸玉中之連城也和林  
正父八句皆奇此尤難者所謂夫子奔軼絕塵而回瞠  
乎其後矣侯喜曰弟子伏矣

某惶恐頓首再拜敬問契家蘭玉之嫗即日清暑恭惟  
尊尊幼幼墮祉山則有廬陵委願奉教小兒幼輿進拜  
既辱先生長者與其進又辱盛禮燕集誨言周諄褒字  
舊綯闔宗榮感喋喋何足以謝姪兆之一二

再答虞少卿

某已端拜天落雲錦之書亦既顓顓奏記以謝嘉惠矣  
而別紙之誨又特達以先國太美櫝窳窳之銘詩詭之  
于愚情不能文者承命怵駭懍莫敢當切惟聖主在上  
文治煥然慶霄所覆萬物五色一時儒宗文師老于文  
學者麇儀鳳師金春球鳴如司馬班范如舒向卿雲如  
韓之日光玉潔如柳之芒寒色正如本朝之歐蘇曾王  
者磊磊相望契丈渡銀漢厯咸池而不酌顧乃過潢汙

行潦牛蹄胥井而輟焉何也契愛不淺命戒甚榮又不  
容趨風以避掩耳而走黽勉授簡以塞盛意敬書丹封  
以呈似悚仄悚仄

誠齋集卷一百八



欽定四庫全書

誠齋集卷一百九

宋 楊萬里 撰

尺牘

謝俞漕舉南昌大兒陞陟

某近十三日燈下大喜走筆以致命召之賀當已上達  
適得大兒書報仰蒙台慈矜惻寒士特賜剡奏舉以陞  
陟劉安登仙雞犬隨之而上天狄公為相桃李皆出於

其門方當知己大用之初首在筆端膚寸之下此舉殊  
絕一路聳觀仰惟異恩盡室懷感喋喋何足以謝少見  
萬分之一耳

答新澧倅胡判院

某伏以即辰春夏之交暄涼之雜恭惟季解府判判院  
鄉丈浮家赴鎮前茅追尋片雲催詩川后靜波天相台  
候動止萬福某恭審上穉圭水衡都內之印寫定國竹  
西烏絲之幅洞庭木葉澧浦玉佩寂寥千載復得今代

之屈宋衣天孫之錦裳提詩人之椽筆以主斯文之夏  
盟何其盛也沅芷澧蘭端可賀矣幼輿如天之福遂得  
走趨服事於清塵之下風訓之以澹菴續弦之膠庀之  
以仲尼上律之天不於門下而望更於誰而望也慶牋  
未往墨妙先之摧謝無多語上言加餐飯下言長相思  
無疾其驅天子有詔某惶恐再拜敬問金玉之堂芝蘭  
之庭即日恭惟尊尊幼幼受祉山則某老病不中使令  
然取履結襪尚堪承命兒曹皆辱榮問至感

答本路張提舉

某伏以即辰春夏之交寒燠挑戰恭惟提舉郎中繡衣  
立漢玉節倚天秋霜百城春雨萬物三神隕祉台候動  
止萬福某納祿為氓遠跡荒野二天覆幬四體不勤此  
賜誰出可諼其感拂日之旆曷月行部當與山農披獨  
連戴夫須九頓首於星輅之清塵將命者還奏記抒謝  
願言迺玉厥躬以柱吾道即從上雍云

某惶恐再拜晉越敬問潭府之居德星之聚即日恭惟

尊尊幼幼善祥山則純嘏川增某卧病餘生固不足備  
牛馬走或者執晏子之鞭取黃石之履猶足代匱不一  
某惶恐再拜賜書之寵光輒致舐犢之賤懇大兒長孺  
過不自量其不才冒昧學製南昌之巖邑行且一考適  
有天幸乃獲走趨服事於使星之末光敢望台慈憐之  
以仲尼上律之天庇之以子美萬間之厦俾得展尺寸  
以竭其力竊斗升以活其孥訓迪其不逮而全度之有  
終不勝寒士祈恩望賜之至

答成都李知府

某伏以卽辰春夏之交寒暄之雜恭惟判府太中鄉大  
身作長城隱若敵國邊圉大競天人具依台候動止萬  
福某齋莊奏記以謝先辱未見願言貴珍大業卽還禁  
近某辭奉玉立十五其霜蜀月楚星萬里同晷一封雲  
錦西風吹來披讀三周驩慰亡量恭承命戒委以先太  
中掩幽之刻老病學落其曷敢當司馬大夫之簡介弟  
得得遠臨以兄之命下走辭之可乎抑文債如山撥之

不開願小紆期會儻擬作章就當得敬淮惟原省焉

與本路運使權大卿

某伏以即辰首夏清和南風薰阜恭惟都運徽猷大卿  
尊契丈外臺倚天使華拂日春雨萬物秋霜百城三神  
儲祥台候動止萬福某自顧黃冠野服之微仰瞻繡衣  
霄漢之貴楚星蜀月各天一方雖欲寄牋書成無雁今  
焉東歸乃獲奏記何喜如之未見君子願言珍重即登  
甘泉法從之綴

某恭審膺受璽書肅將冰漕錦江玉壘回岷峨曉日之  
旗雲棟雨簾煥桑梓畫衣之繡過家邇止即拜榮如恭  
惟都運徽猷大卿嗣中興佐命之英為昭代典刑之老  
郎星卿月徧春風玉筍之班使傳仙槎犯北斗銀河之  
浪乃底可績式邁其歸即陪紫禁之鶯花密綴彤庭之  
筆索某十年不見千里相思獨有二天晚託故人之覆  
燾憑將尺素小摠慶語之慇懃仰惟台察

某惶恐再拜敬問台閤玉婣即日恭惟尊尊幼幼受祉



川增某惶恐再懇大兒長孺不量愚駮試邑南昌遂獲  
密依使星之末光俯充臺治之下走敢望御以柔轡寬  
其疲驚憐之以仲尼上律之天庇之以子美萬間之厦  
俾得効尺寸以展其力竊斗升以活其孥始終保全不  
勝寒士幸願

答隆興府王倅

某伏以即辰春夏之交暄涼方戰恭惟府判太中同寅  
帥閩分月湖山天迪仁賢台候動止萬福某敬澣濯衣

冠上記連教仰謝于相先伏惟原省

某山林野夫分犢草眠鷗沙影響不達於市朝姓名不  
至於通貴顧獨聞督府之貳有君子焉盛名與五緯爭  
光雅德與三江同流而未得一識私竊恨之敢謂達官  
貴人乃折節以下草野雲錦一封自天而落意氣燠休  
勞苦劬愉又投贈之以先正木杪龜趺之碑盥手漱口  
三讀九歎仰覩前輩立朝伏蒲之大節卓詭切至之忠  
言僕雖老矣猶得師也何福如焉摧謝之心尚倍萬於

此紙上之云云者畧訥於心筆又訥於喙爾

某惶恐九頓首以敬問盧家白玉之堂楚天綠荷之屋  
德星之聚飛仙之墟即日恭惟尊尊幼幼受祉山則某  
老病無能為役然豈無取履結襪之可執者傾耳以俟  
也某惶恐有懇大兒長孺適有天幸乃得充下走於大  
府託蔭映於慶雲教載之全度舍魯何適焉

答周監丞

某伏以卯辰老紅驅春衆綠生夏恭惟致政提舉監丞

尊契天台座老子之龍簸弄明月仲尼之鳳頤頤飛霞  
堪輿爲渠川嶽盡護台候動止萬福爰暨金玉之堂芝  
蘭之庭安期羨門之集受社山則某一生強項少信機  
祥而疇昔夜者玉蟲作花如太華之蓮吻與清旭乾鵲  
饒舌如魏人之譟家人子輩咸曰是必有異僕固胡盧  
而心誹之也言未既而韋公五朶之雲謫仙一封之錦  
自天而落矣隻梁雙摘莫非寸裁金而雙截璐也意者  
乘成先生撐腸以東壁西崑之藏滌筆於冰甌雪椀之

泓而然耶不然何其一字不似人間來也若其期汗漫  
於九垓之上御風往反或命中車於青原之雲或掉孤  
舟於白沙之烟其出也道乎前者維有白鷗和其哦者  
維有黃鸝僕亦不得而追也其歸也夾其輶者維有荷  
芰候於門者維有楊柳僕亦不得而隨也其人亦不得  
而追隨則其書顧不可襲而寶乎昔歲冬年之約蓋出  
於尊公相君不敢以聞耳僕焉敢作意起事乎且此世  
俗之苛禮也非吾人之內心也尺素勞苦固所願得而

望賜者所約豈為吾輩之情話恩舊也哉鳳毛仇香似  
聞捧檄覲省即有膝上文度之喜可羨可妒某三雛偕  
出而王陳二倩夫婦皆挾扶床坐膝者來歸相伴甘受  
其聒不落莫也辱多問故及願言永綏眉壽聖主三王  
乞言之益七十二鑽勿厭勿倦勿靳

答提舉雷郎中

某伏以即辰離治肇修清暑云穉恭惟提舉郎中尊契  
丈身兼三官名齊十賢遠毗如幾鯨波如砥自天祐之

神介聽之台候動止萬福某來日無多前途就窄羅雀  
之門亦無雀可羅矣軍將打門蓬首出問乃吾天上故  
人飛墮雲錦之書訪問生死之語詞溫如春意厚如親  
至於清酒百壺花羅八兩東坡江瑤之品蔚宗寶熏之  
妙紛委狎至殆將塞破野人茅棟矣酒錢與鄭衣著遺  
白數百年無此事矣古風蕭蕭公獨追還士俗所闕與  
時高下豈細也哉顧老病之人無以堪之耳言之多多  
亦祇以贅頗聞莫徭小蠢隨即殄殲頗勤指蹤否大兒

數來迎侍張帥亦一遣泛宅初欲一往竟未能也東湖  
西山招王勃喚山谷尚不要徐洪那要病翁耶荷荷未  
見願言珍重即還雞翹豹尾之間以昌斯文

答彭澤王縣尉

某恭承千里寄聲示誨文編讀至潛玉述宣子誅詞氣  
沛然如銀河倒挂孰能禦之進而未慙老夫當避路矣  
王亞夫有子可賀也已二境詩呈似一笑

答黃宰



某蒙命戒新學記書丹夫以賢令君之盛舉鄉丞相之  
古文而某乃得挂名經端縱不我命猶將求旃矧有命  
乎示及方目卷子即當落筆

與江陵范侍郎

某伏以即辰離治厥初清暑猶穉恭惟判府安撫閣學  
侍郎尊契夫卧護北門身作長城威惠交加天人咸若  
台候動止萬福某老病日侵僵卧待盡眇然未有參拜  
之期不勝大願願言式玉厥躬以棟吾道即間兩社均

宏四海某一昨台座持祥刑之節於湘江某服輓輅之  
後於建業大兒長孺每得從載後車於淡巖活溪之上  
是時嘗一奏記未幾相如諭蜀畫繡錦里而野人則解  
組懸車歸畊巖石之下楚星已月相望萬里公之便了  
我之奉一皆隔其蹟矣然雪山倚空而照人伶俜之影  
無一日不在光映之中也契丈正學懿文何必減當家  
之玉堂鳳池孤忠壯節何必減宗人之文正忠宣人物  
無不及而名位有未稱僕寧勿言之生癭姑置姑置

每懷館中之樂公之珠乘自史院而東出僕之柴車自  
提舉廳而西入相顧交揖竚立小語今如在天上而况  
賞梅石渠登高風篁也乎僕亦勿言言之斷腸

某惶恐再拜進越敬問台座自揚祖荆浮家移鎮嫂氏  
淑人一行尊穉能勿勞動即日恭惟蒙福山則令似直  
閣今幾人先是未塗闕扇之時每動乃翁之念今有子  
萬事足矣老妻兒女列拜起居有廬陵委否某惶恐賤  
懇第三男幼輿不量穉騃初習為吏充員澧州慈利縣

監稅故人作尹眼為青之句願賦山谷是詩也又有至  
懇長孺之妻兄承直郎澧州推官吳堦文詞炳蔚才識  
敏明廉已仁民足周世用某淳熙己酉假守筠陽之日  
渠為戶掾極賴其助是時未作親也首以京狀薦之今  
又有余丞相顧守二章矣唐憲亦許以職司之章舉之  
獨合尖未有盛舉敢告契大帥司特輟今年下半年一  
京削以成就之不啻某受此龐鴻之恩至懇至禱

答湖北唐憲

某奏記節下三致一志焉伏勤誨答訪問生死情文綯  
練榮感萬斯幼與初習為吏便蒙天上故人招為入幕  
之賓脫之潢汙轉之清波使某與老妻聞之感激不寐  
也吳推文字極費區處死罪蒙許來歲京削至感至感  
聞家塾一新義學多士朋來敬往一古詩以詠歌盛事  
惟一笑而棄置之

與澧州趙守

某惶恐敬致賤懇推官吳承直璫大兒之妻兄也文詞

炳蔚才識敏明廉已勤民足優世用某淳熙己酉假守  
筠陽渠為戶掾極得其助是時尚未作親也首以京削  
薦之今又有余丞相顧守二章唐憲亦許以職司之章  
所天缺者合尖之舉也適有天幸乃獲趨事戟纛之末  
光敢望台慈特輟上半年一京削以成就之似聞幕下  
賓贊多初官未用得文字計亦無爭者惟台座一灑薦  
墨則五章之恩併歸門下不然則九仞虧一簣矣其利  
害輕重大小仁人必動心焉

答吳節推

蒙諭趙澧州書今上納如看訖却緘蠟而投之范帥亦  
有一書幼輿託庇并求尊親京削令幼輿錄呈也唐憲  
回書封去某又再懇之矣陳漕無半面不曾通書亦不  
曾作幼輿託庇之書彼此無情分豈可干求談何容易  
不惜取辱但無益耳餉脯醢果實至感

答吉州趙倅

某恭聞總司盡蠲糴事此蓋通守仁賢深軫民瘼誠心

所格金石為動某何力之有重勤謝幅何敢當也叙報  
不莊惶恐惶恐

答江東耿運使

某伏以即辰祝融仲月昌歆佳辰恭惟都運大監殿撰  
尊契文玉節拂天冰漕流地百吏秋廩一路春生高厚  
給扶台候動止萬福某老病日侵少安田里皆天上故  
人五緯之芒九河之潤所照映而滲漉者敢忘所元未  
遑參拜願言保合太和對揚休命即侍甘泉用光吾道



某頃者台座自陝以東召公主之適小兒入京因之奏  
記仰勤報教煢然餘生介在邨落如坐井底乃不知有  
護堂之戚不獲修生芻之弔今奉尺素赴告乃始聞焉  
欲唁則後矣所謂既除喪而後越人來弔者耶死罪死  
罪台座經世之材冠出漢庭諸老之右郎星卿月使節  
州麾顯庸加績簡在上心久矣寄徑簪橐運掌鈞樞端  
不作難此海內所仰目也五年之間再臨舊部孰不有  
下喬木之歎尺一式適可倚而竢

其挂冠林下死灰不燃朽株不芽過者掉臂而契夫不  
遠千里詔書寄聲訪其生死此事今無古或間也推謝  
之詞萬此寧有足耶

某惶恐再拜敬問契家台媿即日恭惟尊穉蒙福餉以  
天花摩姑鰥魚鯊線海錯宣筆下拜珍感之至大兒長  
孺荷合尖之大恩得僥改秩之官南昌行且一考次公  
幼輿為衡澧稅官亦皆之官矣併辱下問尤感尤感

答韓總領郎中

某伏以即辰五絃解慍八能奏音恭惟奉使總領郎中  
尊契文上應列宿外饒師干天人是孚河嶽盡護台候  
動止萬福某老病日侵未先朝露微我天上知己疇以  
慶雲之惠何以逮此未占參拜願言導迎叶氣裒對龍  
光即第從臣之嘉頌

某恭審對越紫泥竊翔粉署氣衝星象虹貫依依鳥之躔  
饒給貌貅輻湊泛舟之役恭惟驩慶某屬者奏記控於  
司聽以鄉邦疇昔之小饑祈臺府蠲除於糴事大懼芻

言之僭自投繡斧之誅敢意宣慈未忘舊部應之如響  
報以好音暖然似春沛以潤澤免符既下闔境驩呼顧  
病夫欲謝而未能忽行李鼎來而繼好一封雲錦訪問  
死生千花越羅衣被寒苦侑以肴核固非珍芳鰈勝絕  
於漸臺鯊宛同於周雅紅暉如瓜之棗霜清大谷之梨  
旅百於前有萬其寵徒知九頓首而坐書不盡言安得  
一交臂而談愛而不見仰惟丈席下燭寸心幸甚

某惶恐再拜借問金堂玉室之閨安期羨門之嬖即日

恭惟亟蒙祉福尊稱惟鈞某病身無可用然取履結襪  
尚堪為役

答鄒校書

某伏以即日五絃解慍八能應律恭惟校書校理秘文  
依光東壁天悲忠賢台候動止萬福某老病日侵前途  
就窄未先朝露蔭映所逮敢忘歸倚侍見眇然願言愛  
此大業對越休命十年鳳沼某也尚竊遲之某深山野  
人雉兔之與處魚鼈之與渚幽屏寂寂姓名不入修門

書問不至朝貴曾謂一代名勝以卓詭切至之言而當  
聖心以博習修潔之儒而表冊府乃於霄漢之上墮雲  
錦之書以辱收之不以其耄老而加斯須之敬乎惟名  
高而詞之卑德盛而心之不足此古聖賢進德無底之  
壑也顧肯與鄉里小兒校科級而競名爵也耶趙載道  
所委記亭子之文某也淺之為丈夫矣以是媿執事

答彭憲

某伏以五絃解愠八能應律即日恭惟提刑直閣郎中

尊契大霜臺拂日玉節倚天一路春生百吏秋肅天棐  
忠賢台候動止萬福某來日無多未先朝露者不曰仲  
尼上律之天覆幬而生殖之乎一寢一飯敢忘所元舊  
因疾趨肅容過闕折屐損一將指疇昔夜痛呻吟呼天  
起視東牕殊不肯白清曉命瘦藤蹠而出忽有軍將打  
門童子走報天上知己詒我一封雲錦之書慰存酸寒  
訪問生死發而占之再拜三讀不覺失痛楚之所在檄  
愈頭風僕始不信乃今知之此惠已不勝其渥矣而又

申之以名酒佳實之餉縹玉芳冽金漿澄清先薦屏攝  
而後敢洗琰開嘗漢之蘭生隋之玉薤程鄉之若下沙  
落之醪鄴風味勝絕所謂有過成莊無不及焉至於來  
禽山風滿把月露昭洗色香味尚帶林下氣韻也一杯  
徑醉深入無功之鄉親睹伯倫之德天高地下之不知  
而何樂正子春之疾之知哉感戢意氣姦兆未多也鄉  
邦自入夏五風十雨未足以喻今歲大抵三日而霖霖  
五日而滂沱不冒田疇不漂室廬食新之望在決日間



耳微祥刑使者平反空圖之仁感召嘉氣曷濟登茲退  
之云胡不均宏俾執事樞山谷云三十餘年霖雨手淹  
留在外作時豐古今同此歎也侍見未有前期不勝大  
願願言愛此大業對越休命細札除書旦晝以須

答蜀帥劉尚書

某伏以即辰六月徂暑南風之薰恭惟判府制置龍學  
尚書尊契大卧護天西名震關外忠勤昭格高厚給扶  
台候動止萬福某病與老期前途就窄覆露所逮未先

狗馬填溝壑耳餘無足為知己道者楚星蜀月萬里相望何從得一瞻玉山滿聽韶鈞願言愛此盛德大業作我明堂一柱即補虛左之席

某日嘗奏記西征前茅之隸上林之鴈石頭之函香如也第覺風來雪山水下灝瀕帶仁聲而挾威譽日夜與之俱東允答平生期望於一世盛名之下者甚欣甚賀廝赤三輩清曉剥啄柴扉驚起猿鶴之夢真謫仙所謂手把一封書如天落雲錦也送以書冊之富侑以藥物

之珍降拜萬感某頃在金陵京丈是時帥蜀以通鑑唐  
書為寄至於太平御覽之書曷昔聞名何嘗夢見此惠  
尤不貲也方當問龍乞水洗開病眼睛窻幾時展一  
編便如見諫議面也小詩摧謝見於別牋惟一覽而投  
之苦海耳

某惶恐再拜進越敬問金堂玉室之閤安期羨門之姥  
即日恭惟尊尊幼幼蒙福山則諸郎學士直閣俱未嘗  
展連教之謁仕學之優衣鉢之付無然歆羨之詩某所

以願賦也大兒獲倚通德之門巢萬間之廈風雨不動如山矣中男皆已之官極感多問如陳開州雖不及一受此鞭竟蒙約王茶馬同上襴墨不翅其受此龐鴻也羅普州荷寄支積奉即送其子渠自有謝緘今付來騎呈似京丈當國天下之士受陰賜多矣當時未必知也今乃知之矣而九京不可作矣煎膠續絃不在門下而馬在乎惟母忽

答本路張帥

某伏以即日六月徂暑南風之薰恭惟判府安撫閣學  
尚書契丈以北斗喉舌之淵曜鎮南紀波瀾之上流令  
修戶庭民安田里天人咸若第祿鼎來台候動止萬福  
某視蔭及夕未先朝露慶雲在上敢忘所元願言愛此  
大業對越休命虛左之席舍我其誰

某深山野人誠不自意天上知己遣紅塵之一騎墮雲  
錦之尺書寸金雙玉之詞秋月華星之字訪問生死慰  
存酸寒此恩不貲矣而蘭生玉薤飲以公瑾之醇德雲

腴雪乳濯以玉川之清風魚麗于留之鯊赤鯉有神之  
鰓又屬饜其口腹而燕及其室家至於念炎官火繖之  
蘊隆則揮之以安石之蒲葵憐明憲集几之寂寥則富  
之以剡藤之玉板窮兒暴富真成塞破茅棟矣恩意隆  
重何以堪之降拜感慚惟誦淵明冥報以相詒之詩以  
謝姦兆之一二而已載惟老病之身未死之間有願未  
伸剝欲駿奔府廷望見瓊樹而嵇康之嬾不翅七者之  
不堪李陵之憊亦復屢鼓而不起情與願違豈非天哉

然先生解榻之意非有胸無心者其誰不懷終當一往  
以讎千里命駕之債僕之業在載馳卒章之二言矣某  
既濯冠盟手發書占之矣則又有文書一函啓滕未既  
而珠璣盈把霜雪回光奪目聳神應接不暇蓋于湖先  
生之手澤也篤素先生有命命以挂名左方夫豈不榮  
然以嫫母譽南威以拙工譏瑜珥借不自忸其若旁觀  
明眸者何勉署數語竟不能竒塞先生長者之命而已  
戒及頤菴詩集序引併奉教頌者天幸乃獲瞻拜淩煙

之冠劍偕哦四字視呂化光二十四頌東坡德威之詩  
彼將僕命我矣重勤齒及震競以之

某惶恐再拜進越敬問台閔玉嫺即日恭惟尊穉蒙福  
山則有委細大唯命長孺愚駭不肖仰戴仲尼上律之  
天密巢子美突兀之屋今知免矣闔族感恩庸有既乎  
更祈終惠不勝大願

答廣西張經畧

某伏以六月徂暑南風之薰恭惟判府經畧敷文左史



舍人契丈以五侯九伯之帥撫百粵羣蠻之封威德兩  
崇華裔交慶三神盡護台候動止萬福某老病日侵荆  
扉晝閉不逢東西行者之便無從奏記以為建牙開府  
之賀而羅令之歸首奉一封之雲錦訪問生死慰存寂  
寥溫詞勗愉厚意篤密所謂故人情誼晚誰似令我手  
腳輕欲漩也台諭以謂蠻俗本自易於填拊非漁小利  
者激其變則徼奇功者促其變可謂洞見西事之根撥矣  
嘗愛亡友張欽夫帥八桂日有勸農之詩曰國之大法

有煜其垂蓋欲爾驚非欲爾施爾或自麗予疚予恫安  
得予心達乎爾衷此真臨人而有父母之心者也此意  
與契文章貢謝表異詞而同指端可相為表裏矣惟契  
夫但辨此心何病蠻俗之不懷事功之不集哉甚賀甚  
賀羅令具道契文知遇訓誨之意居諸邑之右甚願展  
布四體罄竭尺寸允答恩地古人之為知己者死死尚  
可而況為之用且求自見於斯世哉破白京削之諾極  
知踐言必不侵為者亦遵紙尾赫蹠之囑不敢漏師於

多魚也一笑衡陽兒子次公昔嘗叅拜再見荷未忘牖  
間之半面且屬齒牙之借譽老懷榮感簡簿老儒尤蒙  
青眼寒士之光也益公事出非意初欲一出謁之緣每  
一見必來山間報謁不欲勤之第以一行之書問勞之  
而已荷問及某與益公同感厚意也未見願言愛重盛  
德大業即還甘泉之著遂膺釣樞之拜台姥尊稱即日  
受祉惟鈞有委不鄙夷之乃幸

與湖北陳提舉

某伏以即辰季夏之月南風之薰恭惟提舉寺正玉節倚天使華拂日登攬有倂風稜肅如三神所釐台候動止萬福某吉蠲泓穎奏記連教未占參拜不勝大願願言愛重大業對揚休命即還第頌之綴

某頃在千官雲片之末行因得盡交四海之名勝而泉山為最名相如梁公則知己之深者詩人如傅安道則投分之厚者是時已聞執事其德似太丘其文似子昂其詩似後山至於領部內則有穉圭之令聞贊廷尉則

有子公之陰德典名藩則有次公之治行其所立皆卓  
然如太嶽之玉立煥然若斗柄之天垂也而僕也獨與  
執事出處不齊也如相避然寸心欽然至今遺恨今乃  
欲以尺紙之敬抒中情之勤以納交於英蕩之末光前  
無契好後無介紹或者以為驟一則野人一則顯仕或  
者以為僭焉抑聞孔文舉與李元禮初無一日雅而文  
舉遠引仲尼伯陽之交以為世契元禮然之吾家德祖  
與公家孔璋同為子建之賓客非世契乎豈曰驟之云

乎張文潛與公家後山初不相識而以一書定交所謂  
朝陽之光在納久矣者其書云耳則僕之尺紙豈曰僭  
之云乎太史公曰可為知者道難為俗人言也

某惶恐再拜僭越敬問金堂玉室之閤安期羨門之堪  
即日恭惟尊尊幼幼受祉山則某老矣無能為役然尚  
堪取履結襪也遲速惟命某惶恐致敬先生長者之初  
不應便有請謁亦惟曠度盛德是恃小男承務郎澧州  
慈利監稅幼輿筮仕之初愚騃無似適有天幸乃獲趨

事外臺之下風敢望憐之以仲尼上律之天庇之以子  
美突兀之屋俾得竊斗升以活其孥効尺寸以展其力  
終始保全免於罪戾不勝寒士如天之福

答張主簿

某恭承誨帖貺以高廟日厯全書某蓋嘗充員吏史官  
載筆一人之數然無力抄傳今忽拜賜喚醒史館之昨  
夢驚喜其可言哉第先使君行狀非如皇甫持正之文  
一字惠一縑者乃蒙潤筆之禮如許不貲何如其感又

何如其忤也摧謝不莊不勝主臣先使君尺牘敬跋數語歸諸挿架云

答郭敬叔教授

某伏奉劄翰諭以令子試藝恩數伏惟驩慶第五法小靳未稱所挾然父子世方園動靜之科允曰吾鄉衣冠之盛事矣大年之父同叔之子猶將弱焉如某諸子若孫之罷駕皆豎幡而降自崖而反矣政使累月答之亦何益也不勝其羨又不勝其妬耳一笑

闕

大附此致賀



云陳丈書信已領

與余直閣

某伏以即日秋暑小却新涼入郊恭惟恩館大孝宮使  
直閣驟嬰陟岵之戚偏奉樹護之養天棊純孝孝履支  
持萬福某敬上記連教伏惟財幸

某屬者先丞相茸蠹就國奏記辱報竊知申甫蕃宣之  
喜夔龍強健之身謂壽考百年未艾也近旬浹間遽傳  
赴告薨逝聞問哀痛一慟欲絕仰惟先丞相宿德尊於

四朝元勲冠於一代皇上為之震悼朝野罔不相弔直  
閣孝誠至性驟失所天何以堪之然不形毀瘠者聖人  
之大戒樹立門戶者人子之大孝敢請強歡淖麋稍進  
溢米漢之玄成唐之德裕與本朝之呂晦叔范克夫世  
襲台踵鼎美名德此某所望於直閣者孺泣難繼哀不  
勝喪豈某所望於直閣某老病不克駿奔會哭於終幕  
之前敬遣女壻陳丞經代某一行不腆奠儀列之香狀  
祭文矣敢冀台察


某惶恐進越再拜敬問北堂國太夫人即日恭惟哀疾  
方新懿候萬福老妻敬致起居慰唁之悃恩閣台嫵長  
稚均祉諸令弟直閣附此弔問有委不外

與范侍郎

某異時簞屨玉之山侶振鷺之渚不自知其為天下之  
至樂也老病棄官居閒處獨每一興懷並游英俊之日  
欲再覲其末光餘韻何可得哉至於蘭薰雪瑩玉粹金  
昭可愛可親可師可敬惟吾范丈一人而已雨來升奠

後雪戒致齋前之句恍若梵瓊有如種玉之牋至今口  
誦心藏而不能忘也荊州楚蜀之衝有古英雄之遺烈  
迨暇登臨當塞破錦囊矣恨不得上下巖壑追逐雲月  
棄百事而從其後也屬者建牙之初過不自量其一寒  
之野夫乃敢奏記於十連之大帥未審或取而一覽未  
忘握手論文之雅乎抑一擲而棄之云我方有公事子  
姑去乎公尚忘我天下誰記我者一笑某不勝主臣敬  
洊致其懇大兒長孺有妻凡澧州推官吳承直環建炎

尚書表臣之孫隆興監丞松年之子也文詞炳蔚才識  
敏明廉己仁民足周世用近嘗進越薦之門下收之允  
足為桃李之嘉種今幸有舉者四員秩滿近在歲杪行  
百里而半九十山九仞而虧一簣仰惟仁人能不動心  
敢望台慈特輟令歲下半年一京削以合浮屠之尖此  
思不貲溟渤非深嵩岱非重也倘辱沛筆端之膚寸導  
畎澮於章奏豈惟吳君如天之福抑亦某實並受之再  
瀆之辜無所逃遁惶恐皇恐



誠齋集卷一百九